

呦呦鹿鳴

古水

癸巳年六月十三 / 2013-07-20

孔沖遠《疏》云：同門爲朋，同志爲友。儔輩曰朋曰友者，或出同門，或齋一志，是之謂也。

君子接交，澹然如水，無利而道合之故。林回曰：彼無故以合者，則無故以離。以利合者利去必散，譬若中美邦交，有時互推樽俎，言笑風生，有時折衝口舌，權稅爭利。其果真友歟？

鹿得莖蘋，不忍獨享，乃呦呦作鳴，喚徠其友。《詩》云：人之好我，示我周行。好我者，吾從之而得路，目之益友嘉賓也，故鼓瑟吹笙，燕樂其心。

舊科舉之制，解試已有鹿鳴宴，鎮撫設筵款簾官、鄉貢，設賓主、薦少牢，俎豆齊備，管弦佐侑，歌鹿鳴之詩，行鄉射之禮，「厭厭夜飲，不醉無歸」，樂融融哉！或有以「鹿」、「祿」音諧故，附以仕進之說，余誠鄙之。

噫！「其桐其椅，其實離離。」願得償乎？